

Mèrance

Â, si v' vôrîz bin d' mi, Mèrance !
Waî, rin qu' d'î sondjî, dj'a l' tchau d' pouye.
Èt ç' n'èst nin dès carabistouyes,
I-gn-a m' pôve keûr qui sûwe lès transes.

Dji bètche après swèssante-deûs-ans,
'L èst timps por mi d' satchî al cwade.
Dji v's-èwalpéyereu dins dol wate,
Foû d' tot ç' qui pôreut yèsse tanant.

Dj'a one bone pension, savoz m' chére.
Deûs maujos, on-apârtémint...
Vos pôrîz fé d' vos rinquinquins
Ca v's-aurîz vosse nom mon m' notaîre.

Gn-a l' Fine qui djèrîye après mi,
Cor one qui tchèsse come one sossote.
Qui freu dj', mi, d'one qui r'trosse sès cotes ?
Ritoûrner à papî-machi...

Mèrance, gn-a nuk cwârps, nuk imaudje,
Ossi nozès èt bias qu' lès vosses !
Vosse blanke gôje, vosse djîvau qui osse,
Tchôkenut l' toûrnis' dins m' tièsse, sins taudje.

Quand nos n' sèrans qu' nos deûs o lét,
Dji laîrè tchaîr mès longs scaneçons.
Insi, dji frè miam ès rigodons
Divant d'ataquer m' pècâvé.

Dji so binauje come on-èfant !
Tos vos riyas ont tchèssî m' pètche.
Quand dji v's-aurè d'né mile lètches,
Nos-îrans rade criyî lès bans.

Tot ç' qui dj' bèrdèle véci, Mèrance,
Dji n' vos l' wasereu sûr dire tot wôt.
C'èst lès bwagnes contes d'onk qu'èst fin fô,
D'on lwagne qui rintère èn-ofance !

Pierre Lazard

Su one idéye da N. Bosret « Emerance »